



# Landjugiprogramm Oktober - Dezember 2023

## Oktoberfest Stuttgart: FR-SO, 29.09.-01.10.2023

O'zapft is! Mit Hirsbrunner verreise mir o das Jahr wieder uf Stuttgart a ds Oktoberfest. Faus du merksch, dass mir ohni di doch nid chöi gah, de mäud di itz grad bir Nadine. Vilech lahtsech no öppis la ihrichte.

## Niese Chilbi: SA, 07.10.2023

Di Chiubi wei mir nid verpasse – chumm mit! Uf di 20:30 gseh mir üs bim Klubrum, när stüre mir zäme ds Oberland ah. D Nadine nimmt bis am 06.10. dini Ahmäudig entgäge.

## Herbstbummel: SO, 08.10.2023

Mit dä Frienisbärger chli ga wandere. Tönt huere guet, oder? Mäud di bis am 05.10. bir Nina ah. Träffpunkt isch im Oberthu. U faus ds Wätter nid mitmacht, gits ä gmüetleche Sunntig bi üs im Klubrum-Kino.



## Wiudässe: DI, 10.10.2023

O uf dä Spiiskarte im Restaurant Jäger ds Langnou herbstelets. Mir göh zäme ga Wiud ässe. D Nina fröit sech uf dini Ahmäudig bis am 03.10. u de gsehtme sech de grad am 19:00 bim Klubrum.



## OLMA: SO, 15.10.2023

Vor OLMA ghörtme nume Guets. Das wei mir üs nid la entgah, schliesslech isch denn Tag der Landjugend. Dr Car isch scho vou, aber du darfsch di no bir Melanie mäude, we du unbedingt wosch mitcho. Daheim blibe muess nämlech (im Normaufau) niemer.

## Tanzkurs: Jede MO ab 16.10.2023

Tanze, tanze, tanze – das isch üses Motto ah 6 Mäntige im Oktober / November. Wed ono gärn drbi bisch, darfsch di mit dim Tanzspändli oder o alleini bir Andrea ahmäude. Dr Tanzkurs statet ca. uf di 19:00 u mir wärde geng ir Region Utzige si. Aus Witere erfahrsch de direkt vor Andrea.



## Schienevelo fahre: SO, 22.10.2023

Velo fahre isch bau chli längwilig. Aber Schienevelo fahre tönt no guet. Genau das göh mir a däm Sunntig zäme ga usteste. Mir traffe üs uf di 14:00 bim Klubrum u ahmäude darfsch di bis am 15.10. bir Jasmin.



## Oktoberfest am Schwandfest: FR, 27.10.2023

Faus du Stuttgart verpasst hesch: Kes Problem, d Landjugi Larutia het extra für di es Oktoberfest planet. Montier dis Dirndl oder diner Läderhose, mäud di bis am 18.10. bir Andrea ah u när gseh mir üs am 19:00 bim Klubrum.

## Soujasset Heistrich: FR, 03.11.2023

Egau ob Profi oder Ahfänger, mir bruche jede Spiler u jedi Spilerin, dass mir zu däm Söili chöme. Mäud di bis am 29.10. bim Bärni ah u när hole mir üs das Viich! Träffpunkt isch 19:00 bim Klubrum.




## HIT: 04. & 05.11.2023

Einisch im Jahr traffe sech am Herbst-Info-Träffe Landjugine us dr ganze Schwiz. Hüür fingt das Träffe ds Niederbüren SG statt u d Landjugi Gossau organisierts. Bi Inträsse darfsch di bir Nina mäude.

### **Cordonbleu-Festival: SA, 11.11.2023**

Ds Wiudässe isch ganz sicher verdouet u mir hei Platz für ahständige Nachschueb. Dr UHT Arni organisiert es Cordonbleu-Festival, wo mir üs so richtig chöi ga d Büch vouchlah. Gib doch am Bärni bis am 04.11. Bscheid, wed uf di 19:30 o bim Klubrum ahzträffe bisch.



### **Volleyballturnier: SO, 12.11.2023**



Alle Jahre wieder chöme d Landjügeler us dr Region cho zeige, was si im Volleyball druffe hei. Stattfinge tuet ds Volleyballturnier am 10:00 im Worbbode. Natürlech wei o mir Worbletaler ahträtte.

Trainiere tüe mir a zwöine Mittwuchabä: 01.11. u 08.11. Du darfsch di alleini oder aus 6er-Team bis am 31.10. bir Andrea ahmäude u de grad ih ds erste Training cho.

### **Znacht mit Vougasparty: FR, 17.11.2023**

We feins Ässe u ä gueti Chiubi zu dine Favorite ghöre, de darfsch a däm Fritigabä nid fähle. Mir göh uf Muri ih ds Hans im Glück ga ässe u zügale när ad Vougasparty. Träffpunkt isch 19:30 bim Klubrum u d Jasmin sammlet bis am 08.11. aui Ahmäudige.

### **Hosenträger-Chilbi: SA, 18.11.2023**

Ohni Hosätreger geit gar nüt u drum macht d Landjugi Schalleberg au Jahr ä Chiubi drus. Da geits ohni üs natürlech nid! Zeig di am 20:30 bim Klubrum u mäud di bis am Abä vorhär no hurti bim Küsu.



### **Pasta mache: MI, 22.11.2023**

Itz si d Chuchitigere gfragt: Mir göh nämlech zäme ga Pasta mache. Säubstverständlech si o die wiukomme, wo dr Teig gschnouset hei, bevor er überhaupt ufe Tisch chunnt. Ahmäude darfsch di bis am 10.11. bir Andrea. Träffpunkt isch 19:00 bim Klubrum.

### **Openair-Fondue: SA, 25.11.2023**

D Landjugi Rüegsbach organisiert wieder es Openair-Fondue. Wüu Chäs immer guet isch, wei mir das nid verpasse. Gib am Ändu Bscheid, we du o drbi bisch. Aui witere Infos chöme no.

### **Santa Run: FR, 01.12.2023**

Bi üs Worbletaler isches zwar aube meh ä «Santa Walk». Aber wüu ds Tempo ke Roue spiut, göh mir uf Bärn ga Chlöis si. D Nadine fröitsech uf dini Ahmäudig bis am 26.11. u de gsehtme sech ufem 18:34-Bähnli im Boll.



### **HV: SA, 02.12.2023**

Ah üsere HV gits ganz viu Sache zum Abstimme über üsi Landjugi u im Ahschluss sogar no es feins Znacht. D Ihladig u d Traktandeliste si scho fasch uf dr Post.

### **Chlöislä: MI, 06.12.2023**

Dr Chlous vo dä Rüegsbächler chunnt verbi. Itz bruchts no dini Ungerstützig, drum chumm uf di 19:00 ih Klubrum. Witeri Infos gits de vor Andrea.

### **Trampolinhalle u Après-Ski Party: SA, 09.12.2023**

Mir wei wieder einisch ga desume gumpe. Das Abentür startet am 16:30 bim Klubrum u nach derä Gumperei göh mir no ga Znacht ässe. U wüu Samstag isch u d Frienisbärger ihri Après-Ski Party hei, stüre mir de no grad dr Usgang ah. Mäud di bim Küsu bis am 03.12. ah – o wed nume ih Usgang wosch.



### **Stärnemärit: FR, 15.12.2023**

A däm Fritigabä wei mir üs ds Bärn chli Wiehnachtsstimmig ichezieh. Mir nähme im Boll ds 19:04-Zügli. Ahmäude bis am 14.12. bir Andrea.



### **Adventsfenster: FR, 22.12.2023**

Dr Bärni het a däm Fritigabä ab dä 19:00 es Adventsfenster. We mir Glück hei, wartet näbst em Fänster ono Glühewii uf üs. Drum mäud di doch vorhär schnäu bim Bärni ah. Faus du übrigens o gärn es Adventsfenster möchtsch mache, darfsch di ab sofort bim Bärni mäude.

### **Klubrum putze u Bowle: DO, 28.12.2023**

Alleini putze isch nid so geil. Aber Gruppe-Putzete isch next level! Drum chumm am 10ni o ih Klubrum u hiuf üs bim Putze. Mir ässe übrigens no feini Pizza, fäge am Nami di Sach nomau düre u göh när zäme uf Thun ih ds Playoff ga bowle. Ahmäude bis am 25.12. bim Ändu.



### **Vorschou**

- Regio-Fondue: amne Abä im November, Datum foug
- Steizyt-Party LJ Heimiswil: Ändi November, Datum foug
- Skiweekend: 12.01. – 14.01.2024
- Hockeymatch SCB – SCL: 03.02.2024
- Regio DV: 23.02.2024
- Europapark: 15. & 16.03.2024

### **Kontakt**

Nina: 079 920 60 81  
Andrea: 079 104 36 68  
Nadine: 077 521 73 69  
Bärni: 076 443 19 57  
Jasmin: 079 618 56 20  
Ändu: 077 459 99 18  
Küsu: 079 924 67 48

Region West:  
Melanie: 077 525 06 35